

Ufficio Stampa della Provincia autonoma di Trento

Piazza Dante 15, 38122 Trento

Tel. 0461 494614 - Fax 0461 494615

uff.stampa@provincia.tn.it

COMUNICATO n. 261 del 06/02/2025

Traduzione in ladino

Varianta de Ciampedel e Cianacei, se ponta via co la projetazion

[Ladino] Con na determina l comissarie straordenèr competent per l'opera, Mario Monaco, estra che sorasant generèl de Apop, l à aproà l azes ai fons, donca a la porzions de teren, touc ite tel projet de la varianta de la strèda anter Ciampedel e Cianacei, te Fascia (opera S-1021 de la Provinzia autonoma de Trent). N passaje che l é de besegn per ge dèr l met ai tecnics de fèr la analyses geologiches e la enrescides geoambientèles, i zertamenc e de autra operazions che serf per meter ju l projet de la infrastrutura. “Se trata del prum vèrech da fèr – despiega l president de la Provinzia autonoma de Trent Maurizio Fugatti – per envièr via la operazions de zertament e de relief per meter ju l projet de chesta opera, che fèsc pèrt di intervenc strategics per l Trentin troé fora da la Jonta provinzièla e per chela che aon troà la ressorses che serf, 140 milions de euro”. “Con chest pel jir inant – l à dit amò apede – la pianificazion de la varianta anter Ciampedel e Cianacei, che tegn cont del dialogh co la comunitàdes e la aministratzions de comun enteressèdes. La varianta l'é n'opera fondamentèla per ge fèr front al problem de la viabilità che da muie te temp palesa l teritorie”.

Col provediment ge vegn dat l'autorisazion, per l azes a la porzions de teren troèdes fora, al comissarie, ai tecnics de l'Agenzia provinzièla opere pubbliche e di Servijes Operes de la Strèda e de la Ferates, Geologich, Gestion Strèdes. La determina do la vegnarà integrèda coi inomes di profescionis e de la sozietèdes esternes a l'aministratzion provinzièla che les vegnarà enciarièdes de meter a jir i relieves strumentèi, i sondajes, l'analisa del riscos e duta l'ativitàdes de projet.

Varianta anter Ciampedel e Cianacei, I percors

Con referiment al percors, la soluzion possibola l é chela stabilida adum da l'autoritàdes istituzionèles e dai tecnics de la Provinzia co l'aministratzions de comun, en referiment solardut al tunel, da la man a sud de Ciampedel e Cianacei, che dajessa l met de tor fora i païjes.

La varianta troèda fora defat la punta via dal nef rondel che l sarà al scombez de Ciampedel, a sud, enlongiaju l'hotel Flora Alpina, la passa via Veisc con n nef pènt e la rua ite sobito te la crepa con n tunel con apede n passaje sot tera de servije e la ciuta fora beleche a trei chilometres più a est da la man a norde de Cianacei, olache ades l é la toronaa che mena ta Dèlba/sun Podoi e Sela. L percors l tegn cont de la picola mudazions fates tel confront coi teritories per miorèr l passaje sora la Veisc.

En dut la neva strèda la sarà longia 3,2 chilometeres, con presciapech 2,8 de chisc te n tunèl tel crep.

Traduzion di Servijes Linguistics e Culturèi del Comun general de Fascia

(cdt)